


Rector dr Glenn Thode:

Universidad bou un solo dak lo ta mucho mas practico



ORANJESTAD(AAN): Directiva di Universidad di Aruba, ta spera cu pronto nan lo por pone e dos facilidadnan cu nan tin na e momentonan aki, den un solo edificio y bou di mesun dak, yá cu esey lo tin miho beneficio tanto pa trahadonan di Universidad pero tambe pa studiantenan cu ta atende e Universidad.

“Universidad a crece, y universidad a habri su portanan na año 1988 den un edificio den Oranjestad, dilanti di Postkantoor cu nos ta yama edificio La Salle, cual antes tabata den man di Frerenan De La Salle y despues esaki a pasa over pa Universidad di Aruba y asina e universidad a habri eynan.

Pero door di crecemento di e universidad e edificio a bira mucho chikito y nos mester a busca otro localidad adicional pa por a duna tog espacio extra na nos trahadonan extra pa cumpli cu tur e programanan y pa e studiantenan extra. Awo-raki nos ta huur un edificio riba Boulevard cu ta un edificio di APEX Building, pero nos deseo lo ta pa en principio pa nos por tin un solo espacio caminda nos por uni atrobe tur e trahado- y studiantenan di universidad y nos deseo ferviente ta pa esaki tuma luga banda di e edificio di La Salle mes.

Nos ta spera cu en berdad hunto cu tur esunnan cu tin interes alrededor den e edificio di La

Salle, nos lo por cu tempo yega asina leu cu nos por haya uzo di e edificionan alrededor di moda cu nos por trece tur trahado y tur estudiante hunto atrobe,” e Rector di Universidad di Aruba a declara.

E proceso aki lo cambia hopi pa funcionamiento di e universidad ya cu por organiza mas actividad pa tanto estudiante como trahadonan y e comunicacion tambe lo ta mas directo y mas efectivo.

“Esaki lo facilita nos cu nos por organiza actividadnan pa tur estudiante miho, pa tur trahado miho, banda di esey comunicacion entre diferente departamento di universidad lo ta mucho mas efectivo pasobra tur ta cerca di otro y lo sinti nan mes den un unidad, y den e areanan informal no mester traha cita pa reuni cu otro, kieren e arena informal bo ta cana bay busca awa, cana bay haci un pregunta

na un colega y asina por topa mas colega na mes momento.

Banda di esaki nos ta preparando tog pa amplia loke nos ta haciendo na universidad cu dos disciplina den todo caso nobo, uno ta nos ta preparando pa bin c’un facultad cu nos ta yamando ‘green faculty’ anto tambe nos ta trahando pa inicia cu tempo establecimiento di e disciplina medico na nos universidad. Si nos tin mas espacio na el a Salle Building mes, nos lo por tin tog e ora ‘collegezalen’ nobo cu lo ta bon prepara pa e tipo di studiantenan ey tambe y pa e cantidad cu nos ta spera di haya,” sr Thode a trece dilanti. Pa loke ta un ubicacion nobo y ideal pa trece tur facultad di Universidad di Aruba bou di un solo dak, tanto edificio como tereno di Frere Bonifacius School ta un opcion tremendo pa logra e meta aki. “Definitivamente en principio e tereno riba cual e school di Frere

Bonifacius ta ubica, e ta pega na e tereno di Universidad di Aruba y si ta berdad cu nos lo por adkeri uzo di e tereno aki, nos lo por kita e cura cu tin entre e dos terenonan aki, e ta bira un tereno mas amplio cu e Universidad definitivamente por mehora su servicionan na e cantidad di hendenan cu tin necesidad di esaki, pa motibo cu nos lo por ta cerca di otro y ta un caminda e hendenan ta bin pa haco uzo di tur servicio di universidad. Pa mi duna un ehempel riba e situacion aki, awor aki un estudiante di derecho cu mas bien ta haya su colegenan na e edificio di La Salle, y si e kier haci un transaccion cu e servicio di studiantenan, nos Office of Student Affairs, e servicio ey ta ubica na e momentonan aki na e edificio di APEX, nan tin cu move door di ciudad di Oranjestad pa yega eynan. Si ta posibel cu nos por uni tur e servicionan aki atrobe

riba un solo tereno, esaki lo yuda definitivamente y naturalmente tin mas tereno al rededor di universidad cu kizas si ta asina cu esunnan cu ta uza e terenonan aki cu e edificionan awor aki ta wak nan futuro den un otro edificio na un otro tereno, universidad sigur ta hopi interesa pa uni esakinan na actividadnan di universidad den Playa,” Rector Glenn Thode a splica. E rector di Universidad a confirma cu ya caba a reuni cu Gobierno riba e posibilidadnan aki, entre otro cu e Minister anterior di Enseñansa, sr Arthur Dowers caminda a trece hopi deseo dilanti riba e particularidad aki mientras cu e actual Minister di Enseñansa, sra Michelle Hooyboer Winklaar, tambe ya caba a hiba combersacionnan riba e puntonan aki y tur cos ta muestra cu ta ser traha pa logra e meta di uni tur facultad di Universidad di Aruba.